

你 Kám 有偉大？

「Lín 知外邦人 ê 中間，hō 人尊做統治者 ê 人會做主來 kā in 治理，in ê 官員 mā 有權 kā in 管轄。獨獨 lín 中間無應該 án-ne。Lín 中間 ài beh 做大 ê 人 tiòh 做眾人 ê 差用；lín 中間 ài beh 做頭 ê 人 tiòh 做眾人 ê 奴僕。（《全民台語聖經》馬可福音 10：42-44）

有一工，當耶穌 kah 祂 ê 門徒行路去耶路撒冷，雅各 kah 約翰 teh 爭論啥人會坐 tī 祂 beh 來 ê 國度 ê 榮耀大位。當其他 ê 門徒聽 tiòh chit-ê tai-chì ê 時，in tòh 受氣，因為 in 認為 chit 兩兄弟想 beh 得 tiòh 大位。

你 kám 有看 tiòh tī hia 發生 ê tai-chì kah 咱今 á 日真 chē 人 ê 態度有類似 ê 所在？基督是叫咱 tiòh 分享咱 ê 能力、影響力、財富 kah 時間；m-thang 想 beh 得 tiòh 眾人 ê o-ló，á 是有任何其它自我滿足 ê 動機，顛倒是為 tiòh beh 利益別人。耶穌講：「因為人子來 chit-ê 世間 m̄ 是 beh hō 人服事，反 tng 是 beh 來服事人，甚至犧牲家己 ê 性命來贖回真 chē 人。」（馬可福音 10：45）。

你 kám n̄ 望成做偉大 ê？Án-ne，你必須成做所有 ê 人 ê 僕人。基督對咱講：「這是我對性命 ê 成功 kah 人類偉大程度 ê 測量標準；這 mā 是天頂 teh 測量你對我—你 ê 救主 ê 忠誠度 ê 標準。」

總是，克制咱人類家己 ê 願望 kah 優先事項，來用耶穌 ê 取代，這是真大 ê 一步！M̄-koh，若是咱想 beh tī 上帝 ê 眼中成做偉大 ê，咱 tiòh 需要 án-ne 做。

耶穌用使徒做基石起造祂 ê 教會，m̄-koh，這是直到 in 有學 tiòh chit-ê 事奉別人 ê 重要課程以後。「偉大」chit-ê 作物，只有 tùi 「僕人身分」ê 種子 chiah 有法度成長。

**祈禱：**上主 ah，我 koh 一 pái tī 祢 ê 話語中 tú-tiòh 對我來講有困難 ê 教示。Chiah-ê 話語我真容易 kā in kah 雅各、約翰連做伙，m̄-koh，對我來講，beh 承認 in mā 適用 tī 我並 m̄ 是 hiah 容易。求祢幫助我承認我 ê 生活需要轉變，tú kah hiah-ê 門徒全款。通過祢 ê 聖神，in 對我顯明基督教 ê 意思是：一個充滿英雄氣概、勇氣、獻身、謙遜、事奉 kah 疼 ê 信仰。所以，求祢幫助我 kā in ê 教示應用 tī 我 ê 生活中。我 án-ne 懇求是奉我 ê 救主 ê 名。阿們。

（1994.03.20）